

Politica agrara – protecziun da muntaneras

■ (cc) La regenza grischuna prenda posiziun davart differentas fatschentas da la confederaziun, tranter auter davart il pachet d'ordinaziuns per la politica agrara 2014 fin 2017 e davart las mesiras per render pli cumpatibel il dretg naziunal cun il dretg internaziunal. Plinavant ha la regenza relaschè ina nova disposiziun areguard la dumonda da la cumpatibilitad da l'agid social cun il mantegniment d'in vehichel a motor.

Naginas reducciuns en la politica agrara sin donn l'agricultura

La regenza grischuna pretenda che la politica agrara 2014 fin 2017 na vegnia betg realisada sin donn e cust da l'agricultura da muntogna. Sco quai che la regenza scriva en sia posiziun adressada a la confederaziun na vegni betg tegnì quint da la voluntad dal legislatur en tut il pachet d'ordinaziuns suttamess per la politica agrara 2014 fin 2017. Tenor quella voluntad duai la nova politica agrara numnadain rinforzar l'agricultura da muntogna. En differentas ordinaziuns ha il cussegl federal fixà tariffas da contribuziun che chaschunan perditas d'entrada en l'agricultura da muntogna. En spezial las reducciuns tar las contribuziuns a favur da la biodiversitad ston – tenor la regenza – vegnir revocadas u cumpensadas a favur da l'agricultura da muntogna.

Betg acceptabel per la regenza è il fatg che la confederaziun prevesa l'introducziun da sulettain in project per chantun per l'onn 2014 en connex cun il nov instrument da promoziun da las contribuziuns a favur da la qualitat da la cuntrada. Pervia da sia grondezza sto il chan-

tun Grischun realisar plirs projects regiunals (communicaziun da la regenza dals 11 d'avrigl 2013). I vegn spetgà da la confederaziun che tut ils projects a favur da la qualitat da la cuntrada ch'èn vegnids inoltrads entaifer il termin fixà per l'onn 2014 vegnian approvads.

Disposiziuns insufficientas per la protecziun da muntaneras

Ensem cun il pachet d'ordinaziuns per la politica agrara 2014 fin 2017 ha la confederaziun er dà en audiziun ina revisiun parziala da l'ordinaziun da chatscha. En la nova ordinaziun da chatscha èn previsas disposiziuns per la protecziun da muntaneras ch'èn colliadas cun mesiras da sustegn en l'agricultura. La finamira da la confederaziun en connex cun la protecziun da muntaneras è quella da reducir las situaziuns da conflict ch'ils animals da rapina gronds chaschunan per l'agricultura.

L'agricultura grischuna è pertutgada directamain da las midadas previsas. Sco quai che la regenza grischuna explitga en sia posiziun sustegna il chantun expressivamain mesiras effizientas per proteger las muntaneras cunter animals da rapina gronds. Dal puntg da vista da la regenza na bastan las midadas previsas dentant betg, cunquai ch'ellas cuntengnan quasi exclusivamain la protecziun tras chauns da protecziun da muntaneras. Alternativas per proteger muntaneras pli pitschnas cun agid da saivs da protecziun, cun lamas e cun asens na vegnan betg resguardadas.

Explicitamain vegni pretendi ch'ils custs per la protecziun da muntaneras na vegnian betg surpigliads sur il preventiv agrar. Tut ils custs che resultan da la pre-

schientscha d'animals da rapina gronds ston vegnir finanziads sur la legislaziun da chatscha.

Cumpatibilitad dal dretg naziunal ed internaziunal: Refusà las propostas

La regenza grischuna refusa las mesiras proponidas da la confederaziun per render pli cumpatibel il dretg naziunal cun il dretg internaziunal.

D'ina vart propona la confederaziun ina midada da la lescha federala davart ils dretgs politics, cun la quala vegniss introducida l'examinaziun preliminar materiala betg lianta d'iniziativas dal pievel areguard la cumpatibilitad da la dumonda d'iniziativa cun il dretg internaziunal. Da l'autra vart duain – a maun d'ina midada en la constituziun federala – vegnir fixads ils dretgs fundamentals, che furman il cuntegn essenzial da la constituziun federala, sco ulteriura barriera per iniziativa dal pievel. Ina iniziativa dal pievel che cuntrafa a valurs fundamentalas da la constituziun stuess l'assemblea federala declarer en l'avegnir sco nunvalaivla.

Per la regenza n'èn las mesiras proponidas ni necessarias ni efficazias. La noziun dals «dretgs fundamentals che furman il cuntegn essenzial» n'è betg clera ed in'examinaziun preliminar d'iniziativas dal pievel fiss ina intervenziun problematica en il dretg d'iniziativa. Tenor il dretg vertent sto l'assemblea federala declarer sco nunvalaivlas las iniziativa dal pievel che cuntrafan a las disposiziuns stringentas dal dretg internaziunal. Fin oz èn vegnidadas refusadas mo quatter iniziativa dal pievel sco nunvalaivlas.



La regenza grischuna fa cleras pretensiuns a la confederaziun par- tenent la protecziun da las muntaneras cunter animals da rapina. LO